

Jos van der Schoot

Jos di Amigoe, un legenda den periodismo

"Mi cara por ta di macamba pero mi curason ta di Aruba" ta loke ela pidi pa pone riba su graf. Periodismo tabata su pasion, aunke cu nunca e no a studia periodismo, e tabata eherce e profesion cu un intensidad perculiar. Su curiosidad, su facilidad pa scribi y su contactonan social a yud'e durante su añanan. Su hobby a bira su profesion y esei a haci cu tur dia ya pa 6 'or di mainta e tabata cuminsa cu recolecta e ultimo noticianan. Tur corant e tabata lesa y e tabata yama su contactonan pa nan dun'e mas informacion si ta necesario, pa e recompila loke e ta bai usa na radio y loke e ta bai usa den corant. Banda di e parti di noticia e tabata percura pa bende propaganda tambe y ta hopi edicionnan special e la yena cu paginan henter.

Ela fungi basta aña como presidente di Aruba Press Club, cu a percura pa institui Dia di Prensa. Den pasado ta hopi congreso y entrecambio cu periodistanan di e otro islanan a wordo organisa. Den su tempo di Aruba Press Club a yuda lanta Bonaire Press Club y St. Maarten Press Club. E semper a mira miembronan di prensa como competidornan, pero cu na final di cuenta ta coleganan di otro. Su deseo di mas grandi tabata pa un dia miembronan di prensa por a organisa nan mes atrobe.

Jos van der Schoot a nace na Tilburg Hulanda riba 30 di december 1924 y a fayece riba 3 di augustus 2006 na Aruba. E la yega via Suriname y Korsow

Aruba na edad di su 21 aña y haci su biba aki riba e 'parel van de Caraibisch Zee' manera e tabata yam'e. Dos aña pasa na edad di 82 aña e la bai sosega.

Na edad hopi hoben ya e la cuminsa traha relatonan pa un revista di Sport en Poloclub TZV na su ciudad natal Tilburg y durante su bida semper ela keda carga Tilburg den su curason. Na 1973 ye la haya un reconocimiento pa esaki ora cu e burgemeester di Tilburg a ortogu'e e Zilveren Legpenning gemeente Tilburg.

Jos van der Schoot a yega Aruba den 1946 pa bin habri oficinan pa e compania di seguro di NEN (Nieuw Eerst Nederlandse), pues e la bin pa bende seguro. Hopi liher e la sinti'e na cas na Aruba y a keda na Aruba te su morto. E tabata bai vakantie Hulanda pa tene contacto cu su famia eyan pero no tabata keda hopi, ya despues di 3 siman e la wak tur cos cu mester a wak na Hulanda y e tabata regresa Aruba. Na Aruba e la cuminsa scribi pa Tivoli Gazet, un revista di e club social Aruba Tivoli y den e revista di Sportvereniging Aruba Junios. Den e mesun epoca ei den su tempo liber e tabata coresponsal pa Amigoe y despues un tempo pa Beurs en Nieuwsberichten.

Na 1960 e la bai traha tempo completo na Amigoe, cu na 1964 a bira Amigoe di Aruba y einan e la traha te ora cu su salud a permiti'e. Na 1951 e agencia mas grandi di noticia di Hulanda ANP (Algemeen Nederlands Persbureau) pa medio di su director van der Pol a bini Aruba y a pidi Jos van der Schoot pa forma parti di nan ekipo. E la bira nan

coresponsal na Aruba y a percura pa Aruba bin mas den noticia na madre patria Hulanda, vooral den e tempo di nos lucha pa baas den nos mes cas bou di liderazgo di Betico Croes.

Di dia cu Voz di Aruba a bai den aire pa prome biaha e tabata percura pa noticia na Hulandes na Voz di Aruba, cu mester a pasa precies 12 'or. Semper e la trata di separa comentario di hechonan, combinando noticia di Aruba cu esunnan di exterior, nieuws uit het binnen- en buitenland, manera e tabata bisa. E propagandan di e noticiero e mes tabata haci tambe y ta hopi lema pegagoso e la manda den aire, manera heerlijk helder Heineken's bier, Van Dorp net iets beter, wat kan kan kan alleen. Den su momento na radio nunca e por a laga afor stimula tur hende pa tene Aruba limpi, ya cu e ta di nos tur.

Hopi distincion e la ricibi durante su carera, manera Ridder in de Orde van Oranje Nassua, Citation of Merit Neth. Ant Public Relation Ass, Aruban Academy Award como mihor periodista hulandes, mihor corant na Hulandes. E tabata miembro honorario di diferente organisacion cu e la duna su tempo y aporte na nan manera SAC, di cua e tabata un di su cofundadornan, Aruba Juniors y Tilburgse zwemvereniging. E la fungi mas cu 30 aña como presidente di Oranje Vereniging y e lo tuma parti den diferente comision cu a prepara bishita di miembro di nos Cas Real. Hopi aña e tabata presidente di e comision



cu tabata percura pa ortagamento di e copa gobernador B.M. Leito na hobennan cu a destaca. Un premio cu ta wordo duna riba Aña di La Reina, despues di e desfile na cu ta tuma lugar de becindario di Wilhelminapark. Riba su iniciativa e copa aki a cambia den gobernador Felipe B. Tromp, nos prome gobernador. Tambe e la dirihi hopi aña Onze Vloot, cu tabata percura pa e contacto entre e marinieran di MSK na Savanta y e comunidad di Aruba. E la pasa den tur e cambianan di tecnologia den medio di comunicacion. Na principio ta riba un typewriter e tabata traha noticia, hincanan den un envelop, cu potret si tabata tin y e envelop aki ta wordo entrega na aeropuerto pa e bai cu avion Korsow, na unda e imprimanan tabata ta. Cu tempo typewriter a cambia pa telefax te cu a drenta den era di computer. E switch no a bai facil p'e. Na principio e computer

den su oficiana a bai riba un mesa leu di su lessenaar, pero poco poco cu e confianza ecomputer a haya un lugar prominente riba su lessenaar y a yega asina leu cu den su kamber na cas tambe a pone un computer. Den radiodifusion tambe e la mira con ta for di studio so bo por bai den aire te cu ultimo sinta na cas via telefon e tabata haci su noticiero Hulandes. E la mira tur e cambianan como mehoracion y scapamento di tempo, cu ta duna e periodista mas tempo valioso pa verifica tur noticia prome cu publicacion, pasobra e tabata kere firmemente cu tur noticia mester wordo publica, ya cu comunidad ta merece pa ta bon informa. Pa informa comunidad bon, e periodista mes mester ta bon informa, e mester verifica su noticia y no bai tras di a tende o ta kere, eseyan p'e tabata roddelpraatjes y si no por a verifica nan, nan no ta wordo publica tampoco.